

## Filipović (Adema) Daut, geometar

Rođen 01.07.1909. godine u Glamoču, Bosna i Hercegovina, u zemljoradničkoj porodici.

Osnovnu školu završio je u rodnom Glamoču, šest razreda gimnazije u Sarajevu.

Želja za pozivom geometra odvela ga je u Beograd, gdje je upisao Tehničku školu – geometarski smjer. Po završetku geodetskog smjera 1932. godine i odsluženja vojnog roka, po rasporedu geodetskog kadra tadašnje Kraljevine Jugoslavije, raspoređen je u Ministarstvo finansija na poslove premjera Srbije. Od 1936. godine radi po raznim srezovima Srbije na premjeru i izlaganju premjera, a rješenjem ministarstva finansija Kraljevine Jugoslavije 1938. godine premješten je kao dotadašnji izlagač-geometar, na teritoriju Finansijske direkcije Banja Luka, odsjek za katastar i državna dobra u Cazinu, a potom Bijeljini.

Daut Filipović je mobilisan 1941. godine kao topografski oficir. Odmah po mobilizaciji zarobljen je u Rakovici kod Beograda i transportovan u zarobljeništvo. U zarobljeništvu ostaje kratko i sa jednom grupom muslimana vraća se u Bosnu i Hercegovinu.

Učesnik je rata od 06.06.1943. do 15. maja 1945. godine i ostaje nakon završetka rata u vojsci do 1949. godine. Po demobilizaciji, raspoređen je na službu u Osijek, a potom u Tuzlu gdje ostaje do kraja života.

U Tuzli radi u upravi za katastar na održavanju premjera i katastra zemljišta, te Birou za geodetske radove.

Zadnje godine aktivnog rada u Tuzli bio je angažovan na sređivanju imovine Zemljoradničke zadruge Gornja Tuzla.

Sudjelovao je u radu geodetskog društva tuzlanskog regiona.

Obučio je veliki broj generacija mladih geometara, a svojim radom i zalaganjem obilježio je svoje godine aktivnog sudjelovanja na premjeru i katastru zemljišta.

Nosilac je ordena za hrabrost i ordena rada II reda.

Umro je 1999. godine u 90-toj godini života.

Za doprinos u razvoju geodetske službe, a u povodu 110 godina katastra Bosne i Hercegovine, Uprava za geodetske i imovinsko-pravne poslove Bosne i Hercegovine dodjelila je 1996. godine Dautu Filipoviću POVELJU.

*Mustafa Begić*